

## → WILAYAH

# Tengku Abdullah dianugerah Ijazah Kehormat Doktor Pengurusan UMP

**Kuantan:** Universiti Malaysia Pahang (UMP) menganugerahkan Ijazah Kehormat Doktor Pengurusan kepada Pemangku Raja Pahang, Tengku Abdullah Sultan Ahmad Shah pada Majlis Konvokesyen Ke-12, sebagai pengiktirafan kewibawaan dan kepimpinan baginda.

Naib Canselornya, Datuk Prof Dr Daing Nasir Ibrahim, berkata ketokohan Tengku Abdullah sebagai pemimpin turut dirasai institusi pendidikan tinggi dinaunginya termasuk sebagai Canselor UMP

sejak 2006.

Selain UMP, baginda juga Canselor Universiti Kuala Lumpur (UniKL) sejak 4 September 2004 dan Universiti Automotif DRB-HICOM, di Pekan, sejak 21 Februari 2016.

### **Peka perkembangan UMP**

Sebagai Canselor UMP, beliau berkata, baginda sentiasa peka dan prihatin ke atas perkembangan serta kemajuan semasa universiti itu yang genap 15 tahun penubuhannya pada 16 Februari 2017.



[FOTO IHSAN UMP]

**Tengku Abdullah menerima Ijazah Kehormat Doktor Pengurusan** daripada Daing Nasir pada majlis konvokesyen Universiti Malaysia Pahang Ke-12 di UMP Kampus Gambang.

"Tengku Abdullah turut menyumbang dalam transformasi landskap sosioekonomi menerusi inisiatif Empower ECEM Mahkota Kuala Pahang yang diilhamkan baginda dan dilancarkan pada 18 Julai 2012.

"Inisiatif itu diupayakan bersama UMP dan Majlis Pembangunan Wilayah Ekonomi Pantai Timur (ECERDC).

"Keprihatinan baginda turut menyaksikan pengembangan capaian manfaat inisiatif ini ke daerah lain di seluruh negeri," ka-

tanya, di sini, semalam.

Daing Nasir berkata, kewibawaan Tengku Abdullah juga terserlah dalam kepemimpinan dan pengurusan sukan melalui pelbagai jawatan serta organisasi di peringkat negeri, kebangsaan dan antarabangsa.

Antara lain, katanya, baginda pernah menjadi Timbalan Presiden Persatuan Bola Sepak Malaysia (FAM), sebelum dipilih menggantikan Sultan Pahang sebagai Presiden FAM mulai 2014 hingga 2017.

"Pada peringkat antarabangsa, baginda pernah menjadi Naib Presiden Konfederasi Bola Sepak Asia (AFC) dan kini Ahli Majlis Persekutuan Bola Sepak ASEAN (AFF) serta Ahli Jawatankuasa Persekutuan Persatuan Bola Sepak Antarabangsa (FIFA).

"Baginda juga menjadi Presiden Konfederasi Hoki Malaysia (MHC) bagi tempoh 2008 hingga 2015, selain Presiden Persekutuan Hoki Asia dan Ahli Lembaga Eksekutif Persekutuan Hoki Antarabangsa," katanya.